



**FOTOAM-BAVAKA Talata 23 febroary 2021**

**Fiarahabana**

**Vavaka**

**“ NY FIANDOHAN’NY FANEHOANA AN’I JESOSY TEO AMIN’IZAO TONTOLO IZAO.”  
Les débuts de la révélation de Jésus devant le monde.**

**Hira : 14** Ô, ry tany rehetra , avia izao

**Vakiteny 1. Jaona 1.19-34**

19 Ary izao no nambaran’ i Jaona, raha ny Jiosy naniraka mpisorona sy Levita avy tany Jerosalema hankany aminy mba hanontany azy hoe: Iza moa hianao? 20 Ary nilaza marina izy ka tsy nandà, fa hoy ny filàzany: Tsy izaho no Kristy. 21 Ary izy ireo nanontany azy hoe: Ahoana ary? Elia va hianao? Fa hoy izy: Tsy izy aho. Ilay Mpaminany va hianao? Fa izy namaly hoe: Tsia. 22 Dia hoy ireo taminy: Iza ary hianao? mba hitondranay valiny ho any amin’ izay naniraka anay. Lazainao ho iza moa ny tenanao? 23 Dia hoy izy: Izaho dia feon’ ny miantso mafy any an-efitra hoe: Ataovy mahitsy ny lalan’ i Jehovah, araka izay nolazain’ Isaia mpaminany. 24 Ary iraka avy tamin’ ny Fariseo ireo. 25 Dia nanontany azy ireo ka nanao taminy hoe: Nahoana ary hianao no manao batisa raha tsy hianao no Kristy, na Elia, na Ilay Mpaminany? 26 Jaona namaly azy ka nanao hoe: Izaho manao batisa amin’ ny rano; fa eto aminareo misy Anankiray Izay tsy fantatrareo, 27 dia Ilay avy ao aoriako, ary tsy miendrika hamaha ny fehin-kapany aza aho. 28 Izany zavatra izany dia natao tany Betania any an-dafin’ i Jordana, izay nanaovan’ i Jaona batisa. 29 Nony ampitso dia nahita an’ i Jesosy avy manatona azy Jaona, ka dia hoy izy: Indro ny Zanak’ ondrin’ Andriamanitra, Izay manaisotra ny fahotan’ izao tontolo izao! 30 Izy Ilay nolazaiko hoe: Misy Lehilahy avy ao aoriako Izay efa tonga eo alohako, satria talohako Izy. 31 Ary izaho tsy nahalala Azy; fa mba haseho amin’ ny Isiraely Izy, izany no nihaviako manao batisa amin’ ny rano.

32 Ary Jaona nanambara ka nanao hoe: Izaho nahita ny Fanahy midina avy any an-danitra tahaka ny voromailala ka nitoetra teo amboniny. 33 Ary izaho tsy nahalala Azy; fa Izay naniraka ahy hanao batisa amin’ ny rano no nilaza tamiko hoe: Izay ho hitanao idinan’ ny Fanahy sy itoerany, dia Izy no Mpanao batisa amin’ ny Fanahy Masina. 34 Ary nahita aho, ka dia nanambara fa Izy no Zanak’ Andriamanitra.

**Fanazavana fohy**

**Hira : 164 :1,2** Jesosy irery ihany : Filazantsara soa

## Vavaka

Ho an'ny ray aman-dreny mba hahay hitondra sy hanambara an'i Kristy amin'ny zanany  
Ho an'ny mpitory ny Filazantsara mba tsy hizahozaho amin'ny titre fa hahay hanetry tena sy  
hahay hametraka an'i Kristy eo anoloana.

Mba hiorina amin'ny fandraisana sy ny finoana ny tenin'i Kristy sy ny asany ny tokintsika ny  
amin'ny famonjena fa tsy amin'ny fomba na fanao mahazatra ny Fiangonana.

Ho an'ireo marary.

## Vakiteny 2. Jaona 1.35-51

*35 Nony ampitson' iny indray dia nijanona Jaona sy ny mpianany roa lahy;36 ary nijery an' i Jesosy nitsangantsangana izy ka nanao hoe: Indro ny Zanak' ondrin' Andriamanitra! 37 Ary ireo mpianatra roa lahy ireo, rehefa nandre azy niteny, dia nanaraka an' i Jesosy. 38 Ary Jesosy nitodika ka nahita azy manaraka, dia nanao taminy hoe: Inona no tadiavinareo? Ary hoy izy roa lahy taminy: Raby (izay atao hoe, raha adika, Mpampianatra ô, aiza Hianao no mitoetra?39 Hoy Izy taminy: Avia, fa ho hitanareo. Koa dia nandeha izy ka nahita izay nitoerany ary nitoetra teo aminy tamin' izany andro izany; ary efa tokony ho ora fahafolo tamin' izay.40 Andrea, rahalahin' i Simona Petera, no anankiray tamin' izy roa lahy, izay nandre ny tenin' i Jaona ka nanaraka an' i Jesosy.41 Izy no nahita an' i Simona rahalahiny aloha, dia hoy izy taminy: Efa nahita ny Mesia izahay (izay atao hoe, raha adika, ny Kristy).42 Dia nitondra azy ho any amin' i Jesosy izy. Ary nony nijery azy Jesosy, dia hoy Izy: Hianao no Simona, zanak' i Jaona; hianao hatao hoe Kefasy (izay atao hoe, raha adika, Petera )43 Nony ampitso dia te-hiala ho any Galilia Jesosy, ary nahita an' i Filipo Izy ka nanao taminy hoe: Manaraha Ahy.44 Ary Filipo dia avy any Betsaida, tanànan' i Andrea sy Petera.45 Filipo kosa nahita an' i Natanaela ka nanao taminy hoe: Efa hitanay Ilay nosoratan' i Mosesy tao amin' ny lalàna, sy nosoratan' ny mpaminany, dia Jesosy, zanak' i Josefa, avy any Nazareta.46 Ary hoy Natanaela taminy: Moa mba misy zava-tsoa va avy any Nazareta? Dia hoy Filipo taminy: Andeha hizaha.47 Jesosy nahita an' i Natanaela avy manatona Azy, dia nilaza azy hoe: Indro ny tena Isiraelita tsy misy fitaka.48 Hoy Natanaela taminy: Ahoana no ahafantaranao ahy? Dia namaly Jesosy ka nanao taminy hoe: Fony tsy mbola niantso anao Filipo, dia hitako teo ambanin' ny aviavy hianao.49 Dia namaly Natanaela ka nanao hoe: Raby ô, Hianao no Zanak' Andriamanitra; Hianao no Mpanjakan' ny Isiraely.50 Jesosy namaly ka nanao taminy hoe: Moa ny nilazako taminao va fa hitako teo ambanin' ny aviavy hianao no inoanao? Hahita zavatra lehibe noho izany hianao.51 Ary hoy koa Izy taminy: Lazaiko aminareo marina dia marina tokoa: Ho hitanareo ny lanitra misokatra sy ny anjelin' Andriamanitra miakatra sy midina eo ambonin' ny Zanak' olona.*

## Fanazavana fohy

**Hira : 381 :1,4** He, ny fiantsoana

## Vavaka

Mba ho tena mpanaraka ny Tompo, izany hoe mandre ny antsony sy mankato ny teniny ny mino fa tsy mpanaraka olona na fombafomba fotsiny.

Mba tsy ho kivy ny mpitory fa hitojo hatrany hitaona ny olona hihaona amin'i Jesosy mba hahitany sy hinoany Azy.  
Ho an'ireo sahirana.

### Vakiteny 3. Jaona 2.1-12

*1 Ary tamin' ny andro fahatelo dia nisy fampakaram-bady tao Kana any Galilia; ary tao ny renin' i Jesosy.2 Ary Jesosy sy ny mpianany koa dia nalainy ho ao amin' ny fampakaram-bady.3 Ary rehefa lany ny divay, dia hoy ny renin' i Jesosy taminy: Tsy manana divay izy.4 Hoy Jesosy taminy: Ravehivavy, moa mifaninona akory Izaho sy hianao? tsy mbola tonga ny fotoako.5 Fa hoy ny reniny tamin' ny mpanompo: Ataovy izay asainy ataonareo.6 Ary nisy siny vato enina mahalany rano indroa na intelon' ny vata avy nipetraka teo ho fanadiovana araka ny fanaon' ny Jiosy.7 Dia hoy Jesosy taminy: Fenoy rano ny siny. Dia nofenoiny hatramin' ny molony.8 Ary hoy Jesosy taminy: Tovozy amin' izao, ka ento ho eo amin' ny mpandahatra ny fanasana. Dia nentiny.9 Ary raha nanandrana ny rano tonga divay ny mpandahatra ny fanasana, nefa tsy nahalala izay nihaviany (fa ny mpanompo izay nanovo ny rano no nahalala), dia niantso ny mpampakatra izy.10 ka nanao taminy hoe: Araka ny fanaon' ny olona dia ny divay tsara no arosomy aloha; ary rehefa nisotro be ny olona, dia vao izay ratsiratsy kokoa; fa hianao kosa dia efa nitahirany ny divay tsara ambaraka ankehitriny.11 Izany no nataon' i Jesosy tao Kana any Galilia ho voaloham-pamantarana, ka nasehony ny voninahiny; ary nino Azy ny mpianany.12 Rehefa afaka izany, dia nidina nankany Kapernaomy Jesosy mbamin' ny reniny sy ny rahalahiny ary ny mpianany; nefa tsy nitoetra ela teo Izy.*

**Hira : 643 :2,3 Ô ! Mandrese ny finoana tano**

### Vavaka

Hahay hametraka eo amin'ny Tompo ny filàna  
Hatoky ny fandaharan'Andriamanitra sy hanaiky ny baikony  
Ho an'ireo namoy havana.

### Vakiteny 4. Jaona 2.13-22

*13 Ary efa akaiky ny Pasky ny Jiosy, ka dia niakatra tany Jerosalema Jesosy.14 Ary hitany teo an-kianjan' ny tempoly ny nivarotra omby sy ondry sy voromailala ary ny mpanakalo vola izay nipetraka teo;15 dia nanao kotopia kofehy Izy ka nandroaka azy rehetra hiala teo an-kianjan' ny tempoly, na ny ondry na ny omby, ary nararany ny volan' ny mpanakalo vola, sady nazerany ny latabatra;16 dia hoy Izy tamin' ny nivarotra ny voromailala: Ento mivoaka ireto zavatra ireto; aza atao trano fivarotana ny tranon' ny Raiko.17 Ary ny mpianany nahatsiaro fa voasoratra hoe: Ny firehetako ny amin' ny tranonao no haharitra aina ahy.18 Fa namaly ny Jiosy ka nanao taminy hoe: Inona no famantarana asehonao aminay, no manao izao zavatra izao Hianao?19 Jesosy namaly ka nanao taminy hoe: Ravao ity tempoly ity, ary amin' ny hateloana dia hatsangako indray izy.20 Fa hoy ny Jiosy: Enina amby efa-polo taona izay no efa nanaovana ity tempoly ity, ka Hianao va hahatsangana azy amin' ny hateloana?21 Fa ny tenany no tempoly nolazainy.22 Ary koa, rehefa nitsangana tamin' ny maty Izy, dia tsaroan' ny mpianany fa efa nilaza izany Izy; ary dia nino ny Soratra Masina sy ny teny izay nolazain' i Jesosy izy.*

## *Fanazavana fohy*

**Hira : 447 :1,2** Hianao, ry Kristy Tompo

### **Vavaka**

Vavaka malalaka faranana amin'ny Vavaka nampianarin'ny Tompo.

**FEHINY** Kolosiana 2.3,6-7

*Kristy, no iafenan' ny rakitry ny fahendrena sy ny fahalalana rehetra.*

*Koa tahaka ny nandraisanareo an' i Kristy Jesosy Tompo, dia mandehana ao aminy araka izany koa, ka mamaka tsara sy miorina mafy ao aminy ary tafatoetra amin' ny finoana, toy ny efa nampianarana anareo, ka mazoto amin' ny fisaorana.*

**Hira : 437 : 1,2** Ry Jeso Kristy Tompo

**Tsodrano** 1Tes.5.23

Ary Andriamanitry ny fiadanana anie hahamasina anareo samy ho tanteraka, ka aoka harovana avokoa ny fanahinareo sy ny ainareo ary ny tenanareo ho tanteraka ka tsy hanantsiny amin' ny fihavian' i Jesosy Kristy Tompontosika.